

豐草菴集

—

蘇子知

PDG

吳興劉氏  
嘉業堂刊

豐草菴詩集自序

七月甲寅作焚研誓辭丙辰燒雜文丁巳理篋中舊詩  
已未授兒古樂府發學道十年不到古人大休歇地非  
獨神骨懦亦筆墨累之也因發憤夜登曉寒樓慟哭古  
佛之前作焚研誓辭其文曰稽首大覺尊玄潛不蚤背  
塵棲玄宅靜綺語自障今日已後永絕文字鏤骨銘心  
盡未來際不斷綺語崇高苦因不斷綺語道岸不登不  
斷綺語離叛佛心故越二日而燒雜文矣余年十六七  
輒喜手評古人之書評後輒悔悔輒更評更評復悔悔  
輒欲自焚乃不果焚也今已志在青鞵布襪因掩戶啟  
篋縱陳癸未已前手評諸書凡數百卷悉焚之是日誤

焚乙酉雜文一卷丙戌悲憤詩一卷其明日兒樵等集  
豐草菴長跪號泣曰大人何至是大人以求古出世聖  
人之道棄家遠遊小子何知豈敢以口舌爭也然大人  
平生欲身扶六經之墜日痛心風雅衰危也幸大人爲  
圖書緩行余呼兒前曰止我墮文字因緣幾三十年今  
復以未焚殘藁留是重自墮也樵未復泣曰大人縱未  
能改新誓濡牘長吟也聊集舊文布人間乎則樵等死  
而更生余歎曰我病不能斷文字緣斷人間緣矣我安  
能詰曲從人間世流布詩文也我少未嘗爲詩爲古文  
辭爲古文辭不一年二年輒自媿且悔悔輒欲自焚一  
焚于癸未之冬焚庚辰已前之文無遺也再焚于丙戌

之秋焚辛壬雜著及十餘年應制之文無遺也又甲申  
乙酉詩歌一編誤以爲應制文俱焚焉丙申焚書則余  
之三焚書也乙酉文丙戌詩之誤焚則余之再誤焚也  
遺文銷落意不存矣我故舊半死生矣我愁坐一室中  
絕往來尺牘十年矣世漸無知我者知我者一二人投  
以詩惟涕泣讀而藏之不敢答矣情之不能忘也往來  
于懷或中夜挑鐙私擬酬和之詩詩成又涕泣反覆長  
吟而藏之亦不復寄矣集中贈答非仲文初孝章諸詩  
是也今世之詩傳人間者無此例也且我不能如世之  
詩珠聯漢魏璧合三唐也不能如世之詩赫然假聲光  
於賢豪長者也不能如世之詩鬼言無蒂沈墮秋煙也

耽情于方外合社于漁樵遊夢于山經孤癖于香法古人我不敢擬今人我不能以爲侶今世之詩傳人間者亦無此例也樵耒曰傳詩文非以例也敢請余曰汝於詩文癖矣今不示汝汝謂我自匿於是出篋中未焚書紙亂編繁大索一日得庚辰已後雜文丙戌已後詩歌各十餘編手授樵等越一日復呼樵耒來前授古樂府發未成之書一編謂曰我今年二月於律呂經緯邈然遠想得風騷情性之至讀古樂府如縱轡天衢也自我作古樂府發則不復作韻語蓋復自悔其詩矣

豐草菴詩集總目

人間可哀編

丙戌

丁亥

戊子

采杉編

庚寅

落葉編

庚寅

西臺編

辛卯

病孔雀編

辛卯

壬辰

紅蕉編

癸巳

登峰編

甲午

臨蘭亭編

乙未

雒陽編

乙未

洞庭雨編

乙未

鬪韻牌編

乙未

丙申

人獨百哀祿

草書詩話卷目

豐草菴詩集卷一目錄

人間可哀編

人間可哀曲 憶昔 怨鶴行 白鶴怨 遙

題巢居 華山畿 讀曲歌 估客樂 子夜

歌 采菱曲 詠美人禮佛 采桑女 詠殘

鐙 雜詩 染爪 詠香煙二絕 紅樓怨

門有車馬客 贈鄰居和唐人 芳樹 宛轉

歌 秋日幽居寄友人 得旣方書 夢華詞

聽雨詞 夢鄉詞 無端語 寄友人 題

昭君圖 簪花美人圖 嚴生書來寄余新夢

故紙中忽見余八歲時手書梵冊因讀先人

示語感而成詠 夢至亂山深處清谿一曲夾

岸繁花人曰此紫谿也 秋日買武夷山志

夢大雪中行匡廬山頂 采蓮歸 錢王孫

漫歌

二首

雨後

責子詩

三首

紀夢遊

暑夜

憶鹿山草堂

雁字

四首

秋日夢卜何

題豐

草菴

豐草菴詩集卷一

吳興叢書

人閒可哀編

吳興董說若雨著

人閒可哀曲

丙戌

四座且勿喧聽我歌人閒人閒未及言淚下何翩翩高  
城鬱嵯峨青樓大道邊浮雲連馬影蹀躞桃花天露濯  
通犀劍日炤珊瑚鞭飛聲震京雒結客到幽燕狹斜歸  
騎擁雷轂音闐闐入門春樹合美女妖且妍尋芳同入  
柳鑑影並窺川新眉圖五嶽峨髻寫飛僊烏棲曲未罷  
垂手舞纏絲酷烈沈榆屑芳芬芍藥煎織翠紋簾皎流  
黃珍簟鮮含情復送豔宛轉華鐙前重來不知處草木  
空蒼然爲君吹玉笛長詠招魂篇

憶昔

憶昔鹿山中嘯讀樵人室鑿牖延危巒翦竹導新術日  
隱遙松翠雨至眾山失僮僕喧奇雲穉子搜野栗幽巖  
富藥苗草樹自儔匹父老四五人昏旦來問疾濁醪不  
足勉聊與論遺逸

怨鶴行

客有南州生少年遠遊不得意流館西吳閨  
人鬱鬱以歿一日託形野鶴飛集生館值生  
醉甚對鶴訴愁鶴忽墮淚生悶絕旣而鳴咽  
爲閨人語云君不如歸去妾死矣魂魄渡江  
尋君至此言訖而蘇鶴亦飛去余聞  
其事爲作怨鶴行復成白鶴怨二絕

白鶴復白鶴獨立兀如醉驅汝汝不飛那作仙人驥  
不鳴亦不舞斜陽傍行子低頭語白鶴惆悵儂如爾  
解一  
解二

白鶴長鳴行客沾裳白鶴淚垂一何琅琅鶴鳴尙自可  
鶴淚愁殺我

三解

呼郎來前念郎愁苦儂不慕封侯願君還故宇欲知腸  
斷絕衣上錢塘雨

四解

夜逐巫山雲搖蕩五湖裏天風知妾恨吹渡蘋洲水

五解

### 白鶴怨

幾回夢裏度金微此夜蘋洲喚客歸與君化作鴛鴦鳥  
越水吳山只共飛

怨鶴唳痕染客衣愁魂歷歷是耶非從今添入相思譜  
不羨當年老令威

### 遙題巢居

崎嶇從夙慕夢訪巢居子俯視青鴻濛深竹隔漁市長  
嘯五湖聞鉤簾千嶺峙觴飛宿鳥外碁落白雲裏何當  
謝人寰領鶴同巢此

華山畿

華山畿黃河日夜流儂情無斷時蓮峰五千仞蓮子若  
爲知一解

華山畿誰能長相思月明松柏路夜夜見題碑二解

華山畿懊惱芙蓉渚秋草語秋風銷落只爲汝三解

讀曲歌

歡是嶺上雲朝往暮來過斜陽炤殘雨儂處獨晴多一解  
皎皎三五夜日月遙相語千秋只望汝二解

東風莫愁儂好向郎邊吹路旁折楊柳春日正長絲

三解

### 估客樂

烏嘯江月落遙村隔煙嶼天寒津鼓澀行人霧中語  
送歡楊柳灣帆轉不知處不及嶺頭雲隨歡千里去

### 子夜歌

輕風拂華林宛轉環珮聲莫將團扇至憎殺合歡名

一解

鏡焰歡容顏歡去空持鏡連喚歡復歡鏡中不曾應

二解

郎在回雁峰飛書寄南浦擣檠染黃牋無處不辛苦

三解

儂家東海頭愁殺西風棗郎腰白羽箭不思刀環好

四解

### 采菱曲

江南日暮涼雲凝遊女盪舟歌采菱鬢學秋煙嬌不理

波文羅綺光崢嶸蓮葉東邊畫橈澀渚平浪淺蜻蜓立  
絲牽並蒂歌聲短葉摘連枝淚痕溼蘋岸風微珠翠香  
影落澄江空斷腸炤見金釵雙孔雀可憐錦帶兩鴛鴦  
宛轉中流弄櫂遲柳塘野雀傍人飛落花狼藉無消息  
直唱菱歌更不歸

詠美人禮佛

環珮鳴清夜心空翡翠樓手垂分舞意聲緩落歌愁磬  
斷風吹帶香殘雁報秋浣紗人悟妄豔色若爲留

宋之問有

浣紗篇贈  
陸上人

采桑女

南鄰女伴至邀踐采桑期開簾拂明鏡且復治容儀花

簪鬟更理衣薰著故遲出門貪炤影還向水中窺

詠殘燈

黯黯愁眉聚沈沈清夜徂霜天聞別雁楊柳正棲烏某  
子敲還倦博山煙又無遙知玉門外邊月炤人孤

雜詩

枯葉鳴園林繁霜炤庭宇攬衣起躑躅憂來浩無主噉  
噉南雁翔沈沈戍樓鼓延頸發長歎遠岫青可數高臺  
知悲風秋草識寒雨不逢遙夜愁安知別離苦

染爪

秋風來幾日安得擣衣砧爲敲金鳳花共立梧桐陰色  
憎脣朱淡影射晴霞深明朝寫眉角紅日透青岑